

Mijler Lourens, manager di Mighty Campo

A yega ora pa un hende para responsable y bira conciente di kico el a causa den un temporada di alegria

ORANJESTAD (AAN): Manager di Mighty Campo y di e banda Search, Mijler Lourens tambe a duna su declaracion pa DIARIO.

El a expresa cu na momento cu Mighty Campo su nomber a worde atacha, e conoce como un persona hopi sensitivo y e dia cu el a gana e trofeo di Rey di Roadmarch el a mire ta yora.

No tabata leuk, a bisa pa mainta tempran mira un hende cu tabata yora atrobe pero e biaha aki di tristeza. E ta kere cu esey a afecte tambe y pesey nan a dicidi di acudi na oficina di mr. Marchena ya cu a yega ora cu un hende mester para responsable y bira conciente di kico el a causa den un temporada di alegria.

A manifesta cu e ta gusta ora cu nan ta menciona nomber di Campo continua-



mente, pero no por mencione net tras di e parti caminda cu ta menciona ta tin corrupcion ta andando.

Si el a sali den un forma positivo, e lo no a preocupa, pero e no a gusta e manera cu el a sali personalmente tampoco, a bisa.

A agrega cu hopi biaha tin hende ta purba influencia publico, pero su forma di

influencia su fanaticonan y su publico ta full diferente cu e resto. Den e caso aki, a señala, Search ta trece alegria dilanti, nan kier trece positivismo dilanti den un pais cu ta den temporada di carnaval.


"Si Calypso e ta canta y e ta protesta, no ta problema, esey ta un cos normal, pesey Calypso tey, pero Roadmarch si ta pa alegria, ta pa gozo, no pa trece tristeza den dje of insinuacionnan cu ta incorrecto, anto vooral den nos direccion of den Campo su direccion", a declara.

Den e caso aki, a subraya, e ta suppose di proteg'e y esey ta locual e ta haciendo. A laga sa cu Mighty Campo ta hopi down, pero esaki no ta bay stroba su carrera, pasobra e ta kere cu den e caso aki, e ta sigur cu el a siña hopi.

Na otro banda, a añadi, cu Antoni Gario mester siña cu e no tin cu haci e cosnan aki mas tampoco.

Esun cu kier e corona, cu ta haya cu nan merece mag di bin buske, pero otro aña

Mighty Campo lo no entrega su corona



ORANJESTAD (AAN): Den entrevista cu DIARIO, Miguel Oliva, "Mighty Campo", a duna di conoce cu el a reuni cu su abogado pa e hecho cu el a dicidi di entrega su corona.

Despues di a delibera su decision cu abogado Marchena, a dicidi cu e lo no haci entrega di su corona.

A bisa cu e punto a bin dilanti cu Le Groove kier e corona y pesey nan tabata kier laga e corona na oficina di SAC pa asina nan por a

pasa buske.

Segun Oliva, tanto su persona como Antoni Gario a gana hustamente nan corona e dia ey sin discusion. E puntonan a sali publicamente ken a gana y ken a haci kico, pesey e ta kere cu no ta husto pa cierto cosnan di corrupcion bin despues "cu mi nomber a wordo papia den dje. Bo kier papia di corrupcion, fine, djis no hinca mi nomber. Ami no tin nada di haber cu esey. Mi no sa nada di esey, mi no tin nada di haber cu corrupcion, nunca den mi bida mi no a haci nada corrupto y mi no ta un hende asina".

A agrega cu si e ta wordo envolvi den algo asina ey, no ta fair. Den "ki contexto cu por ta, "mi nomber no mester ta den ni un grabacion di ni un hende tocante di esey".

Mighty Campo tambe a manifesta cu esun cu kier e corona, cu ta haya cu nan merece "bo mag di bin buske otro aña, pero bo tin cu gana mi pa bo haye".